

## Mid-Day Dogri News Bulletin, 20<sup>th</sup> May 2024

समे - दपैहरी 12:25

<><><><><><><><><>

### Polling National

लोकसभा चुनाएं दे 5में गेड़ तैहत अज्ज 6एं राज्यें ते 2 केन्द्र शासत प्रदेशें दिएं 49एं पार्लिमानी हल्कें च इसलै वोट पाए जा'रदे न। इस गेड़ तैहत उत्तर प्रदेश दिएं 14, महाराष्ट्र दिएं 13, पच्छिम बंगाल दिएं 7, ओडिशा ते बिहार दिएं 5-5, झारखंड दिएं 3 ते जम्मू कश्मीर ते लद्दाख दी इक-इक पार्लिमानी सीटें लेई चुनां करोआए जा'रदे न। मतदान बडलै 7 बजे शुरू होआ हा ते एह संजा 6 बजे तोड़ी चलोग। चुनाएं दे इस गेड़ तैहत जेहड़े प्रमुख मेदवारें दी किस्मती दा फैसला होना ऐ, उंदे च बीजेपी दे नेता ते केन्द्री मंत्री राजनाथ सिंह, पियूश गोयल, स्मृति ईरानी, कांग्रेस लीडर राहुल गांधी ते के.एल.शर्मा, नैशनल कांफ्रेंस दे ओमर अब्दुल्ला ते एलजेपी दे चिराग पासवान शामिल न। चुनाएं गी बेहतर ढंगै सिर करोआने लेई 94 जहार 732एं मतदान केन्द्रें पर 9 लकख 47 जहार मतदान अधिकारी तैनात कीते गेदे न। अज्ज ओडिशा विधानसभा दे 35एं असेंबली हल्कें लेई बी वोट पोआए जा'रदे न। इस गेड़ तैहत 8 करोड़ 95 लकख मतदाताएं चा 4 करोड़ 69 लकख मर्द मतदाता, 4 करोड़ 26 लकख महिला मतदाता ते 5 जहार 409 ट्रांसजेंडर मतदाता वोट पाने दे अपने अधिकार दा इस्तेमाल करगंन।

<><><><><><><><><>

### Polling Baramulla Ladakh

जम्मू कश्मीर दी बारामुला-कुपवाड़ा लोकसभा सीट ते लद्दाख दी इककली लोकसभा सीट लेई अज्ज वोट पाए जा'रदे न। वोट पाने दा कम्म बडलै 7 बजे दा शुरू होई गेदा ऐ ते एह संजा 6 बजे तगर जारी रौहग।

बारामुला हल्के दे किश इलाकें च खरी मती गिनतरी च लोकें गी मतदान केन्द्रें दे बाहू अपनी बारी लेई बलगदे दिक्खेआ गोआ ऐ। इस हल्के थमां चुनां मैदान च खड़ोते दे 22 मेदवारें दे सियासी भविक्ख दा फैसला तकरीबन 17 लक्ख योग्य मतदाता अज्ज संजा तगर ईवीएम मशीनें च बंद करी देंगन। बारामुला हल्के दे 4 जिलें बारामुला, कुपवाड़ा, बांडीपोरा ते बडगाम दे किश हिस्सें च कुल 2 जहार 103 मतदान केन्द्र खड़े गेदे न। कश्मीर संभाग दे विस्थापत मतदाताएं लेई 26 खास मतदान केन्द्र खड़े गेदे न। इंदे चा 21 मतदान केन्द्र जम्मू च, 4 दिल्ली ते इक उधमपुर जिले च बनाया गेदा ऐ। कश्मीरी विस्थापत मतदाताएं लेई बड्डलै 6 बजे शा लेइयै संजा 6 बजे तगर मतदान केन्द्रें तोड़ी लेने ते उत्थुआं वापस आहनने दी सुविधा बी उपलब्ध करोआई गेदी ऐ। इस हल्के लेई जेहड़े मुख मेदवार चुनां मैदान च न, उंदे च नैशनल कांफ्रेंस दे उप-प्रधान उमर अब्दुल्ला, जम्मू कश्मीर पीपुलस कांफ्रेंस दे प्रधान सज्जाद गनी लोन ते तिहाड़ जेल च बंद साबका विधायक ते आजाद मेदवार इंजीनियर रशीद शामिल न। तोआई लद्दाख सीट लेई शड़े 3 मेदवार गै चुनां मैदान च न। इंदे च बीजेपी दे ताषी ग्यालमन, कांग्रेस दे सेरिंग नामग्याल ते आजाद मेदवार मोहम्मद हनीफा जान शामिल न। लद्दाख संसदी हल्के च कुल 1 लक्ख 84 जहार मतदाता न जिंदे चा 95 जहार 926 कारगिल जिले च ते 88 जहार 877 लेह जिले च न। हासल जानकारी मुजब दिने 11 बजे तगर बारामुला-कुपवाड़ा संसदी हल्के च 21.56 फीसदी मतदान दर्ज करी लैता गेदा हा। वोट पाने दा कम्म रमानदारी कन्नै जारी ऐ। तोआई लद्दाख पार्लिमानी हल्के च दिने 11 बजे तगर 27.87 फीसदी मतदान दर्ज करी लैता गेदा ऐ।

<><><><><><><><><>

### Jammu Migrants Polling

26 जहार पंजीकृत कश्मीरी पंडित मतदाताएं चा 18 जहार शा मते विस्थापत मतदाता बारामुला-कुपवाड़ा लोकसभा हल्के लेई अज्ज होआ'रदे मतदान तैहत जम्मू संभाग च वोट पाने दे अपने हक्के दा इस्तेमाल करगंन। आकाशवाणी दे जम्मू संवाददाता मुजब इस हल्के लेई कुल पंजीकृत 26 जहार विस्थापित मतदाताएं चा 12 जहार 926 मर्द ते 13 जहार 74 महिलां मतदाता न।

चुनां विभाग नै विस्थापत मतदाताएं लेई कुल 29 मतदान केन्द्र बना दे न जिंदे चा 24 जम्मू च, 4 दिल्ली च ते इक उधमपुर च ऐ। जम्मू च दऊं ।नगपसंतल च्वससपदह स्टेशन बनाए गेदे न जिंदे च इक जगटी च ते दुआ उदयवाला बोहड़ी च ऐ। इंदे चा उदयवाला आले मतदान केन्द्र पर 2 जहार 103 मतदाता पंजीकृत न।

<><><><><><><><><>

## OGWs Detained

बन्ने आले जिले पुंछ च सुरक्षाबलें आतंकवादिं दे त्रै कथित ओवर ग्राउंड वर्करें गी जन सुरक्षा कनून तैहत हिरासत च लैता ऐ। आकाशवाणी दे जम्मू संवाददाता दी रिपोर्ट मूजब प्रदेश च कनून बवस्था बनाई रक्खने दे मकसद कन्नै जिला पुलस पुंछ नै जिला मैजिस्ट्रेट हुंदे थमां थहोए दे हुकमै पर कारवाई करदे होई आतंकवादिं लेई कम्म करने आले इनें ओवर ग्राउंड वर्करें गी गिरफ्तार कीता ऐ। एह सब्बै मेंढर थाह दे गुरसाईं ग्रां दे रौहने आले न। पुंछ ते राजौरी जिले च पिछले 2 बरें च आतंकवादी हमले होए जेहदे च केई सारे सुरक्षा कर्मी शहीद होए ते किश नागरिक बी मारे गे। पुंछ ते राजौरी जिला अनंतनाग संसदीय हल्के दा हिस्सा न जित्थें 25 मई गी 6में गेड़ तैहत मतदान होना ऐ।

<><><><><><><><><>

## Udhampur E-Buses

गर्मिं दी इस रूतै दरान जम्मू ते उधमपुर बष्कार ई-बस सेवा शुरू होने कन्नै एह सफर बड़ा अरामदेह बनी गेआ ऐ। उधमपुर जिले च पैहली बारी एह सेवा शुरू कीती गई ऐ। ई-बस सेवा लेई इक बक्खी दा कराया 120 रपे रक्खेआ गेआ ऐ ते तकरीबन डेढ़ घँटे च ई-बस अपना एह सफर पूरा करोग। उधमपुर ते जम्मू बष्कार शुरूआती तौर पर अर्जे 5 ई-बसां चलाइयां गेइयां न ते इनें बसें गी चार्ज करने लेई उधमपुर बस अड्डे पर इक चार्जिंग प्वाइंट बी बनाया गेआ ऐ।

इनें बसें च कैमरे सने होर दुइयां लोड़चदी सुविधां उपलब्ध न। बसें च आपात स्थिति लेई पैनिक बटन दी सहूलत बी दस्तेयाब ऐ।

<><><><><><><><><>

## Jammu Schools

बड़ी मती गर्मी गी दिक्खदे होई जम्मू दे स्कूल निदेशालय आस्सेआ जम्मू खिते दे सोए आहले जोन दे स्कूलें दे समें च बदलाव कीता गेआ ऐ। आकाशवाणी जम्मू संवाददाता दी रिपोर्ट मूजब इसलै पवारदी बड़ी मती गर्मी दे चलदे सारे सरकारी ते निजी स्कूलें दा समां बडलै 8 बजे थमां दपैही 12 बजे तगर होग। एह आदेश अज्जै थमां लागू होई गेआ ऐ।

<><><><><><><><><>

## Jammu Heat Wave

जम्मू संभाग च जबरदस्त गर्मी दा प्रकोप बरोबर जारी ऐ ते जम्मू च कल दिनें दा तापमान 41.8 डिग्री सैल्सियस दर्ज कीता गेआ जेहड़ा इस रूतै दा अजें तगर दा इत्थें सब्बने शा मता तापमान ऐ। आकाशवाणी जम्मू संवाददाता दी रिपोर्ट मूजब मौसम विभाग नै 27 मई तगर खिते च मौसम च कुसै बड्डे बदलाव दी पेशगोई नेई कीती ऐ। पिछले इक हफते थमां बड़ी मती गर्मी पवारदी ऐ ते जंदी 16 मई गी इस रूतै च पैहली बारी जम्मू च तापमान 40 डिग्री थमां बद्ध तापमान पिछले किश दिनें थमां चला'रदा ऐ। मौसम विभाग नै उआं अगले 2 दिनें च जम्मू कश्मीर दी टार्मी-टार्मी थाहें पर बरखा पेई सकदी ऐ।

<><><><><><><><><>